

Mga Balud

Gardeopatra Quijano

Mga balud, mga banha nga balud,
Nga paraygon kaayo mohalok
Mohadla sa mamatahum baybayon :
Dili ba kaha kamo magmahay
Kon mobalik na ngadto sa lawod?
Dili ba diay kamo maluoy
Nga inyung talikdan ang baybayon?

May panahon nga kamo malumo,
May panahon nga kamo mabangis ;
Usahay matam-is ang inyong awit,
Unya sa kalit kamo modahunog ;
Dili matugkad ang inyong giladmon,
Puno kamo kanunay sa damgo--
Magpatubo kamo ug handurawan.

Maputi ang inyong purongpurong,
Nga sa lapyahan sa dagat ibilin ;
Malipayon kamo nga maglumba
Managilog pag-abut sa daplin ;
Kaha sa inyong kinailadman
Gilukot ang maanindot nga gasa,
Nga gipadala alang kanako.

Apan mga balud nga tabian :
Nganong hagkan ninyo ang bayabayon?
Nganong hubgon ninyo sa parayeg
Ug talikdan usab dayon?
Ayaw ako ninyo paghaloki,
Wala kaninyo ang akong kalipay,
Siya da ang mohalok kanako!